

CUSSEGL GROND

Sessiun da favrer 2023

Incumbensa da la fracziun da la PLD concernent l'extensiun da la forza idraulica (emprim sutsegnader Luzio)

La crisa actuala d'energia ans ha mussà ina giada dapli, quant impurtantas che ovras idraulicas naziunalas èn per garantir il provediment da la Svizra e da l'Europa cun electricitad. Tant projects pli pitschens sco er projects gronds dovran sustegn en las proceduras e ston vegnir manads uschè svelt sco pussaivel tras ils process da permissiun. Ils projects da forza idraulica fan diever da la funtauna d'energia regenerabla aua e duain perquai er vegnir promovids; quai vala er per projects d'accumulaziun e per projects d'accumulaziun a pompa che daventan pli e pli impurtants per equilibrar la producziun ed il consum. Els porschan la flexibilitad ch'i dovra per garantir ina rait stabila.

En il Grischun datti actualmain dus projects pli gronds: in è l'ovra idraulica Chlus en il Partenz e l'auter l'ovra d'accumulaziun a pompa Lago Bianco en il Puschlav. Sche quests dus projects pudessan vegnir realisads, fiss quai ina gronda plivalur per il chantun Grischun. Igl è numnadamain incontestà che la forza idraulica grischuna è impurtanta per il chantun Grischun sco er per sia populaziun e per sia economia en quai che concerna l'economia d'energia, l'economia publica, l'economia regiunala e l'economia da finanzas.

Uschia incumbenseschan las sutsegnadras ed ils sutsegnaders la Regenza da suttametter al Cussegl grond ina proposta concreta per sustegnair e per accompagnar optimalmain ils proxims projects da forza idraulica strategicamain relevants, per ch'els possian surmuntar svelt ils proxims obstachels e vegnir realisads.

Cuira, ils 15 da favrer 2023

Luzio, Jochum, Berweger, Altmann, Bundi, Censi, Donatsch, Hartmann, Hohl, Holzinger-Loretz, Kasper, Loi, Michael (Castasegna), Natter, Pfäffli, Rodigari, Rüegg, Schutz, Stiffler, Thür-Suter, von Tscharnier, Wieland